

# Frauedaach

Moin Kummbeer Schorsch hott misch vor e paar Daach oogerufe: Honnes, isch will emol bei disch kumme, wonn hosden Zeit?

Isch gebb ze Antwort: Du waaßt doch, dass isch noch nitt fort kann, was issen los?

Doo seeder: Isch muss emol medder redde.

Gut, saach isch, kumm heit Middaach um Drei, donn trinke merr e Tass Kaffe sesomme, iss derrs recht? Die Fraa gieht oikaafe, awwer de Kaffee kann aach isch mache.

Um korrz nooch Drei war de Schorsch bei merr unn noochdem de ersde Schluck Kaffee gedrunke war seeder: Honnes, mir misse was ferr unser Mädcher due, enn Frauedaach mache.

Isch habb gons erstaund geguggd, awwer gesaad: Enn Frauedaach? Dess iss gut. Onn was hosden gedenkt, Schorsch?

De Schorsch: Waaßde, die dun su vill ferr uns, doo missde merr uns emol mett irschend ebbes su rischdisch donkbar zeische.

Isch druff: Awwer nitt mett Blumme. Weil doo heeßts: Saach oofach Donkeschee unn due nitt unnödich Geld ausgewwe,

Widder de Schorsch: Mir misse uns ebbes oifalle losse.

Isch habb geniggd. Dess mache merr. Misse merr dess gleich mache odder hotts Zeit?

De Schorsch: Honnes, dess mache merr gleich.

Isch frooch: Hosde schunn e Idee?

De Schorsch hott de Kobb geschiddeld. Naa, dessdeweese bin isch joo bei derr.

Isch saach: Ei donn wolle merr mol sesomme iwwerleesche. Blumme sinn nix unn zum Esse oilade iss aach nitt besonners kreativ.

De Schorsch hott e Schnud gemacht. Warum nitt? Doo brauch se doch nix ze koche.

Naa, saach isch, dess iss halt nix Besonneres. Was hälsden defoo, die Wohnstubb ze schmigge? Meddem Plakat, selbst gemold?

De Schorsch hott gegrinsd. Frierer hädde merr die Schloofstubb geschmiggd.

Isch habb aach gegrinnt. Schleeschdschwätzer, awwer recht hosde. In de Kisch e Plakat uffhänge, selbst gemold unn druffgeschriwwe: Unserer lieben Frau.

Naa, naa, rief de Schorsch, doo moont se, dess wär ferr die Muttergottes. Awwer irschend ebbes mett Babier, e Urkund villeischd wär nitt schlecht.

Isch frooch: E Urkund, soll se die uffhänge?

De Schorsch hott die Achsele gezuggd. Warum nitt? Awwer Babier iss gut. Isch waaß jetzt was merr mache.

Isch wusst nitt wasser wollt. Ei was donn?

De Schorsch: Mir dun enn Liebesbrief schreiwe.

Oh ja, saach isch, enn Liebesbrief schreiwe iss gut.

De Schorsch hott sisch die Händ geriwwen. Unn den leesche merr moins, wenn se dess Frierstigg gemacht hott, grad newer ihr Kaffeetass. Unn saache: Setz disch hie unn due emol lese, was doin Schatz derr geschriwwe hott.

Ja, saach isch noch emol, enn Liebesbrief schreiwe iss gut. Awwer isch due moin Brief mette Post schicke, mett emm scheene Gruß zum Frauedaach. Doo werdd se sisch wunnern, wenn se enn Brief vunn mir kriehe dut.

De Schorsch war traurisch. Dess kann isch nitt mache. Weil bevors Kättche de Brief uffmächd, seet se: Der iss doch vunn dir, warum hosden den donn nitt newer die Kaffeetass geleschd? Die sibbsisch Cent hädde merr uns sparn kenne. Eiern Honnes